

**lokal**

# Teruja pakej umrah murah

Golongan B40, pesara sering menjadi sasaran sindiket tipu promosi ibadat di Tanah Suci

Oleh Mohd Haris Fadli  
Mohd Fadzil  
am@hmetro.com.my

**Kuala Lumpur**

**G**olongan berpendapatan rendah (B40) serta individu yang baru sahaja bersara antara yang tertinggi menjadi mangsa penipuan pakej haji dan umrah.

Pengarah Jabatan Siasatan Jenayah Komersial (JSJK) Bukit Aman Datuk Seri Ramli Mohamed Yousuf berkata, berdasarkan laporan diterima didapati punca utama ia berlaku berikutan ramai terpedaya dengan pakej umrah pada harga tidak masuk akal.

"Punca utama dikenal pasti adalah kelemahan dan keghairahan mangsa sendiri apabila mudah diperdaya dengan pakej umrah yang murah dan harga yang tidak munasabah.

"Seperti contoh, terdapat iklan pakej umrah lengkap berharga RM4,500 walhal mustahil harga seperti itu memandangkan harga tiket kapal terbang sahaja sudah mencecah RM4,000.

"Itu tidak termasuk kos makan, penginapan, kelengkapan dan pengangkutan lagi," katanya kepada Harian Metro.

Menurutnya, tahap kesedaran yang rendah dalam kalangan masyarakat untuk membuat semakan dengan pihak berkuasa berkaitan sebelum membuat pembelian pakej um-



**Punca utama dikenal pasti adalah kelemahan dan keghairahan mangsa sendiri apabila mudah diperdaya dengan pakej umrah yang murah"**

Ramli

rah antara punca perkara ini terus berlaku.

Katanya, dalam usaha membanteras aktiviti pe-

niipuan itu, pihaknya bekerjasama dengan Kementerian Pelancongan, Seni dan Budaya (Motac) dalam

menyalurkan maklumat berkaitan salah laku syarikat atau ejen umrah yang melanggar peraturan kepada orang ramai.

"Polis juga bekerjasama dengan beberapa persatuan industri pelancongan yang bertindak sebagai mata dan telinga pihak berkuasa dalam menyampaikan maklumat berkaitan penipuan.

"Selain itu, hebahan melalui media massa dan platform atas talian berkenaan kepentingan membuat semakan terlebih dahulu sebelum mengambil

apa-apa pakej umrah atau haji juga dijalankan," katanya.

Ramli berkata, antara modus operandi yang sering dikesan antaranya syarikat terbabit akan menggunakan wang pembayaran daripada satu kumpulan jemaah untuk membiayai kumpulan terdahulu sehingga terjadi snowball effect.

Selain itu, ada juga suspek yang menggunakan gambar ustaz dan ustazah selebriti atau ikon terkenal bagi mempromosikan pakej umrah jauh lebih mu-

rah terutama di platform media sosial.

"Jumlah kerugian tertinggi yang dicatatkan setakat ini ialah sebanyak RM161,880 berkait satu laporan polis yang diterima di Negeri Sembilan.

"Mangsa membuat laporan polis dengan mewakili seramai 29 orang mangsa yang ditipu dalam pakej umrah.

"Jumlah kerugian keseluruhan tahun ini (Januari hingga Ogos) membabitkan kes penipuan pakej umrah dan haji adalah RM1.35 juta," katanya.



**»INFO**

Ada suspek yang menggunakan gambar ustaz dan ustazah selebriti atau ikon terkenal bagi mempromosikan pakej umrah jauh lebih murah terutama di platform media sosial.

Nilai kerugian tertinggi yang dicatatkan setakat ini ialah sebanyak RM161,880 berkait satu laporan polis yang diterima di Negeri Sembilan.

SEBAHAGIAN daripada jemaah umrah dari utara terkandas di Lapangan Terbang Antarabangsa Kuala Lumpur (KLIA) beberapa tahun lalu akibat agensi yang mengendalikan pakej umrah gagal dihubungi.



JEMAAH umrah sering menjadi sasaran sindiket penipuan kerana permintaan tinggi umat Islam bagi mengerjakan ibadah itu berbanding ibadah haji yang agak terhad.